

**Uunga siunnersuut: Aalisarneq pillugu Inatsisartut inatsisaata  
allanngortinneqarneranik Inatsisartut inatsisaat nr. xx, uu. qqqq 2012-imeersoq**  
(Aalisarnermut, Piniarnermut Nunalerinermullu Naalakkersuisoq)

**Akissuteqaat**

(Aalisarnermut, Piniarnermut Nunalerinermullu Naalakkersuisoq)

**Aappassaaneerneqarnera**

Matumuuna Inatsisartut Aalisarnermut, Piniarnermut, Nunalerinermullu Ataatsimiititaliaanni ilaasortat siunnersuutip siullermeernerata kingorna ataatsimiititaliami suliarineqarnerani sulilluarsimanerannut qujassuteqarfigissavakka.

Naalakkersuisut naammagisimaarpaat ataatsimiititaliap – Naalakkersuisutuulli – ingerlatseqatigiiffiit inuilluunniit pisassiissutinit pigisanik toqqaannartumik toqqaannangitsumilluunniit pisinermikkut pisassiissutinik siunnersuummi pisassiissutit 5 procentiinik qummut killiliussamik qaangiisunik pigisaqalinnginnissaat pingaartimmagu

Naalakkersuisut taamatut siunnersuuteqarput pisassiissutinit pigisat sinerissamut qanittumi qaleralinniarnermi aalisartunut sapinngisamik amerlanerpaanut pigisassanngortinneqartarnissaat siammarniarlugu. Peqatigitillugulu Naalakkersuisut anguniagaraat pisassiissutit qummut killilerneqarnissaannik siunnersuuteqarnikkut aalisartut aalisartunit allanit aalisarunnaarniarlutik kissaateqartunit pisassiissutinik suli allanik pisinermikkut aalisarnermik ingerlatatik annertusisittassagaat ineriartortillugillu.

Naalakkersuisut kalaallit aalisarneranni aningaasaqarnermut uumassusilinnullu tunngatillugu ajornartorsiutaasut ataavartumik aaqqiivigineqarnissaat ilungersuutigaat, taamatuttaaq sinerissamut qanittumi qaleralinniarnermi annertusaanissamik nutarterinissamillu ajornartorsiutaasunut tunngatillugu. Qaammat februaarimi sinerissamut qanittumi qaleralinniarnermi Naalakkersuisut pisassiissutinik inunnut ataasiakkaanut tunngatitanik tunineqarsinnaasunillu atuutilersitsinerat tamatumunnga atatillugu isigineqassaaq. Tamakku suliarineqarput ukiorpaalussuit ingerlanerini. Kattuffiit taamatut sulinermut peqataasimasut qutsavigerusuppakka innuttaasullu ataatsimiitinneqarnerini kiisalu aalisartut piniartullu peqatigiiffiinik ataatsimeeqateqartarnerni oqaaserineqartartut qujassutigalugit.

Inunnut ataasiakkaanut tuniniarneqarsinnaasunillu pisassiissuteqalernikkut maannakkut sinerissamut qanittumi qaleralinniartut ukiunut arlalinnut siumut aalisarnermik pilersaarusiortarnissaanut, pisassiissutinik pigisatik qularnaveeqqusiullugit taarsigassarsisarnissaminnut inunnillu aalisarnermut peqataassallutik soqutigisaqartunik aningaasaliisussarsiorsinnaanerminnut periarfissaqalerput.

Taamaammat Naalackersuisut inatsisissatut siunnersuut taanna Naalackersuisut Kalaallit Nunaanni piujuartitsinissamik tunngaveqarluni imminullu akilersinnaasumik aalisartoqalernissaanik kissaateqarnerannut tunngatillugu ilangaaqqutissatut pingaarutilittut isumaqarfigaat.

Taamatut oqaaseqarluta Naalackersuisuniit siunnersuutip akuerineqarnissaa inassutigaarput pingajussaanneerseqarnissaalu qilanaaralugu.